

Šejh Avdaga & Semiz Poluga

Kratke poruke, crtice i drugi zapisi objavljeni na stranici na Facebooku „Šejh Avdaga“ (kasnije: „Šejh Avdaga & Semiz Poluga“) autora Kenana Efendića. Stranica je bila aktivna od ljeta 2015. do ljeta 2025.

23. 07. 2015

Ima ljudi i žena u namazu glasno uče, hoteći belćim da ih Allah bolje čuje, a onda kroz mrak šapore ružno o komšijama i rođijacima svojim misleć da meleki ne prisluškuju.

24. 07. 2015

Šta goj da insan na ovome svijetu izabere, pogriješiće jer je ovo pogrešan svijet.

24. 07. 2015

Pitaju me džematlije tako jel se zaoprave more i druga žena na prvu dovest, pa i treća na drugu, a i četvrta na treću. Pito me to jednom i jedan Zahid, od svojih šeset i pet godina, jedan Zahid, jedan penzioner, holco drva život cijeli ko i otac mu. More reko, Zahidbeže, al ako moreš prema svakoj svaku noć bit jednako pravedan.

24. 07. 2015

Ima džematlija, znam ih ja, dojdju na džume samo da bi potlje mogli vikati da je hodža nevaljo i da im je tražio opet para. Ne morate dolaziti više slobodno vičete to što vičete i bez da dojdete.

26. 07. 2015

U čitabima požutilim napisano je da će žene koje ljude svoje ne slušaju unić u džennet, ako budu dobre vjernice, al da će stalno boraviti u neakvim magazama džennetskim. Tako su pisali ljudi učevniji od mene, al jope - Allah najbolje zna.

28. 07. 2015

I kad vas kakav belaj strefi, ne pogledajte prema nebu i ne vičete "Što se ovo meni dešava, klanjo sam i postio, zekat i sadaku davo". Ako već niste zaslužili ono što vam se desilo, onda ćete poslije zaslužiti, jerbo insan griješi ha se rodi i svaki put kad dihne i malo harama potegne.

29. 07. 2015

A djecu svoju ne tetošite i ne mazite ko da su najvrednija djeca na dunjaluku, ima djece bezbroj i svako je dijete vrijedno, jerbo će sutradan kad budu ljudi i žene odrasli misliti da su vredniji od drugih pa će nesretni po Zemlji hodati.

29. 07. 2015

Ne tražite vazdi pomoći od hodže, bolje je đahkad obratit se Allahu odmah, jer Allah ne čeka da se hodžino samelje.

30. 07. 2015

Bolje Allahu bit dužan sto namaza nego čojeku deset maraka. Allah dugove oprašta a ljudski hakk je golem teret.

05. 08. 2015

A kad prid vama ružno govore o onima koje znate i za koje znate da su dobri mumini i muminke, nemojte u rasprave ulazit. Rasprave su šejtansko kolo i kaurski običaj. Ako ništa ondak barem opomenite i recte da je ogovaranje haram gadan i da je bolje meso brata svog jest neg poštena insana ogovarati i priče o njem pričati.

07. 08. 2015

Vidim ima vas po internetu povazdan o šestom šartu raspravljate, a ne znate ni sve meleke nabrojiti.

17. 08. 2015

U Ćitabu stoji da Allah jedne narode drugima smjenjuje, a vi se ibretite kad insan vam drag preseli.

24. 08. 2015

Ima alima i šejhova vele da je manji haram džumu ofulat nego žensku suzu izazvati. Ima opet žena plaču ha zinu, al Allah najbolje zna.

25. 08. 2015

Ima opet ljudi nauče sureta dva-tri pa hafize ispravljaju. U Ćitabima starim stoji da će takvi džehennemsku patnju već u kaburu iskusiti.

26. 08. 2015

Ima vas nekih pitate me je li dobro ići u tekiju, žalite se da su vam jarani i djeca počeli ići po tekijama, pa šta hoćete da idu po javnim kućama i kafanama?

26. 08. 2015

Pričao mi moj džematlija Hasan kako je išao na hadž u onaj vakat, kad su komunisti vladali. Zapalo ga eto tam dok su oko Ćabe hodali uz nekog crnca da kruži. Ko u jednom trenutku naišareti Hasanu taj crnac, ko eto Okle si brate. Više njemu Hasan - Jugoslavija. Smije se crnac više Tito, Tito. Kaže Hasan smijem se i ja al u sebi sve mislim, tobe jarabi, da ti Tito dere mater, šta mi ga kraj Ćabe spominješ, i osovah se kraj tebe i kraj njega.

27. 08. 2015

Ima ljudi odu u džihad a kod kuće im ostanu žena sama i djeca gladna.

28. 08. 2015

Kruži godinama po raznim krajevima ta pričica o hodži koji je zanesen vajzio pa ga ponijelo ter je, eto, reko: Kad bi jedna iskra iz džehennema na zemlju spala, ošlo bi sve u, ne mogu lajat, materinu.

Ne znam je li to istina, ali ja bih ovoj priči vjerovo.

31. 08. 2015

Ima ljudi glavni him poso povazdan vikat da su hodže lopovi i da treba boljeg rejsa tražit a kad ih upitaš plaćaju li članarinu oni viču "Drugo je to".

03. 09. 2015

Ima ljudi gledaju u stranice Musafa a čitaju ono što misle.

06. 09. 2015

Kažu da je Sirat ćuprija duga nolko kolko si među pomjerio na ovom svijetu.

07. 09. 2015

Ima ljudi i žena nedaće ih i iskušenja prate od rođenja do pa do preseljenja. Sve muminske i muslimske obaveze obavljaju, i čehra im fina, ali opet belaj na belaj. Pa onda mene upitaju: Što, šejh-efendija? Ne znam, velim, belćim neke dugove iz ezela vučete. Allah najbolje zna.

07. 09. 2015

Ima žena dojdju pa reknu De hodža zapiši šta god, krava neće nikako da spusti, krepaćemo bez mlika. Neću reko, kravama pišu veterinari i propale hodže. Škole ote struke nisam učio a nisam billahi još ni propo.

09. 09. 2015

Ne odgađajte dobra djela, vičuć: Ja ću to kad ostarim, Pašće ti vrijednost dionica u džennetu, mumine.

10. 09. 2015

Imam zadnjih godina džematlija par, koraće se kad u saf stanu. Pitam Što to vi tako momci. Vele zbijaju safove da šejtani ne prolaze. Pa dobro reko, što onda panjeve među noge ne metnete.

11. 09. 2015

Došo mi neki dan džematlija Džafer, imućan čojek, poduzetnik štono danas kažu, više: Efendija, izgubio sam goleme pare, ne znam de sam torbicu ostavio, evo danima ne mogu da najdem. Džafere, reko, jesi zekjat davo. Nisam, veli, efendija, konto sam kasnije ove godine. Eh reko, da si na vakat zekjat dao, ne bi sad sve te pare uvakufio na neviđeno.

15. 09. 2015

Ima ljudi i žena ko da ih i nema.

18. 09. 2015

Ima ljudi i žena u Džehennem odu već na ovom svijetu. Al oni to ne znaju.

21. 09. 2015

Ima ljudi jedva čekaju da Kurban Bajram bude prvog u maju pa da jednim metkom dva zeca ubiju. Takvi neće vidit ni sevapa ni valjanog zaposlenja.

23. 09. 2015

Čita mi unuk Ramiz vijesti s kompjutera, viče: Dido, u Sarajevu uveli šerijatsku policiju. Čuj, rekoh, šta im radi ta policija? Veli, hodaju po gradu i hapse žene u kratkim suknjama. Ih, velim mu ja, najlakše je tako, ja mislio oni provjeravaju ko ne plaća zekjat. Viče Ramiz: Pa nije to finansijska policija. Eh, velim, znam da nije, znam.

28. 09. 2015

Ima ljudi legnu prid buldožer kad put treba kroz njihovu zemlju proć. Kažu alimi da će se takvi ljudi na onom svijetu valjat pred vratima dženneta moleć da ih se upusti. Al molbama odgovoreno neće bit.

01. 10. 2015

Ima srca ne bi radosti osjetila da tuđih nesreća nije. U takvim je srcima šejtan sebi sigurno skrovište našao.

04. 10. 2015

Ima ljudi i žena siju kompire a nadaju se jabukama. Svako bere ono što je zasijo i niko tuđi teret na svojim leđima ne nosi.

05. 10. 2015

Ima džematlija i džematlijki, dođu mi pa se žale na komšije i komšinice, pa sve malo, pa malo reknu: Nemoj ti, hodža, mislit da ja ogovaram, ja bih vako i prid njima. Pa eto, reko, živi bili, nemojte sad, sačekajte da i oni dođu pa onda ćemo sve prid njima, nek čuju.

05. 10. 2015

Nemojte ružno o izbjeglicama govorit. I Pejgamber je bio izbjeglica.

06. 10. 2015

Ako jezik ne slomite na tešdidu do dvaneste godine poslije je kasno. Učte djecu sufari na vakat.

06. 10. 2015

Ima ljudi na džezovima im ne mereš lopatu otet. Jednom Tajibu ja objašnjavao više puta da to lopatanje nad kaburom i nije neki posao kad nas ima stotinjak, da je to recimo jedan počasni čin u kojem svak treba da učestvuje. Al jok. Tajib i naki ko Tajib kad uzmu lopatu ne treba im pomagat, zakopaće mejta sami u pešest minuta. Što li, kako li - ne znam, ne moram ni znat, al mi se nekad čini ko da Azraila zakopavaju pa misle, belćim, neće izać ako ga dobro zakopaju pa neće ondar ni po njih doć. Ljudi misle, a Allah određuje.

07. 10. 2015

Kažu u Sarajevu ima jedan mujezin započne ezan za akšam a završi ga za jaciju.

07. 10. 2015

Došo neki dan jedan naš Fejzo, u Njemačkoj živi i radi godinama, ovdi kuću sagradio poveliku, pa dojde ponekad, svrati i na akšam. Viče neku noć poslije akšama: Kako to da je Njemačka jedna kjafrska zemlja, a Bosna jedna muslimanska, a opet Njemačka čišća i urednija od Bosne. Nisi, velim mu, brate Fejzo, u pravu, ja sam čuo da u Njemačkoj ima više muslimana neg u Bosni.

13. 10. 2015

Braćo i sestre, nek nam Allah ovu godinu učini boljom od prošle. Amin!

14. 10. 2015

Ima ljudi ne mogu kod kuće uspostaviti vlast nad daljinskim, pa im žene serije gledaju kad su utakmice, al oni bi da hilafet uspostavljaju.

15. 10. 2015

Ima žena u gaćama hodaju al su prve i najglasnije kad treba objasniti jel se neka bula pokrila kako treba.

16. 10. 2015

Ima djece ko zadnja se stoka ponašaju, al dobra su to djeca kakvi su im roditelji.

17. 10. 2015

Ima ljudi i žena čitaju samo između redova jer su, eto, valjda oni pametniji od drugog svijeta, pa oni i ne moraju redove čitati. A kad krenu gluposti u razgovorima prosipati, onda viču: Ehej, jaraniko, ja sam to između redova pročitao.

19. 10. 2015

A lađe svoje pravite od sevapa svojih.

20. 10. 2015

Kažu da u Sarajevu ima jedna tekija u njoj se nezaposleni zaposli, neudata uda, neoženjeni oženi a gladni najede. Neka, mašalla.

20. 10. 2015

Ne zavaravajte se, na Sudnjem danu nema bedela.

26. 10. 2015

Ima ljudi i žena jedno govore, drugo misle a ništa ne rade.

06. 11. 2015

Ima mujezina kad zauče insan se pridigne ko da je na Bedr kreno, tolko te ezan osokoli. A ima opet, mujezina, kad zauče, insan bi najrađe kod kuće sam sa sobom džemat uspostavio. Al nije džemat ono što nam se sviđa, nego ono što treba.

12. 11. 2015

Ima ljudi i žena Mjesec s nebesa da im ko dokaz skineš oni bi ti rekli: Eh, lahko je Mjesec, haj Sunce. U čitabima starim stoji da su u takvih ljudi i žena srca zapečaćena šejtanskom pljuvačkom.

13. 11. 2015

Kad su ono vladali komunisti, bio se navadio jedan inspektor Šabić dolazit mi prid džamiju i agitovat protivu klanjanja i Boga inače. Nisam se ja smio bunit, narodu sam govorio da šuti i ide za svojim poslom i gleda prida se, a mene jednom upita: Avdaga, ako je taj tvoj Bog svemoguć, može li stvoriti kamen koji sam ne može podić? Reko: Zavisi. Od čega, kaže. Reko: Od toga jel Bog to hoće ili neće.

13. 11. 2015

Šaljete mi poruke mlogi od vas, pitate me šta mislim o toj svadi bivšeg reisa s tim neakvim književnikom iz Tuzle. Ne znam, braćo i sestre, ne treba se baviti bivšim stvarima i ljudima.

23. 11. 2015

Ima ljudi i žena koprcaju se u blatu a krevelje se obijesno drugima prkoseć ko da tobože lete.

24. 11. 2015

Pita me moj džematlija Admir, fin al polijen momak: Je l mojoj ženi haram što radi u kladionici? Nije, reko, al jest tebi što besposlen kod kuće sjediš. To je bilo iza džume zadnje, evo nema ga otad u džamiji.

26. 11. 2015

Zavist je opasna štetočina, od čijeg otrova srca vaša trebaju da se štite imanom i znanjem da nije vas smisao na ovom svijetu.

26. 11. 2015

Ima ljudi i žena niko ne bi zaplako ni da ih nema.

30. 11. 2015

Ima ljudi evo povazdan se brinu kako će, šta će, ako se zarati. Pitaju neki i mene a ja nemam ništa pametnije reć nego: Nabavi dobre čizme i s bismilletom.

01. 12. 2015

Ima ljudi i žena krvi da im dadneš oni bi ti opet i sok iz očiju ispili. Tako je to kad nema u insanu ni mrve imana.

13. 12. 2015

Ono iza rata počelo mi kroz džemat par momaka hodat u nekim haljama s kraćim nogavicama. Što vi to reko tako, momci? Veli ovaj jedan: Ashabi su ovako. Pa jeste vi ashabi, reko.

15. 12. 2015

Nekad treba presjeći sve misli i potihlo reć: La ilahe illellah Muhammedu Resulullah.

22. 12. 2015

Nekim ljudima ovo moram ponovit: Nemojte ružno o izbjeglicama govorit. I Pejgamber je bio izbjeglica.

05. 01. 2016

Javlja se narod, pita Što ti Avdaga šutiš, vidiš da se svašta dešaje, iznesi svoj stav, reci šta je ovo. Ne znam, ljudi dragi, što bih šutio da išta znam.

11. 01. 2016

Ima u džematu džematlija Ahmet, kad ga upitaš Kako je Ahmetago? on uvijek otpovrne Neriješeno. Tako ga neku noć prid akšam upita onaj Huremov mlađi, Ahmedin, Kako je Ahmete?, viče Ahmet: Neriješeno. Kaže ovaj mali Pa jesi spreman za produžetke, kaže Ahmet naš: Biću kad me ukopate.

15. 01. 2016

Vidim ima vas nekih nešta se protivite ovoj Rejsovoj naredbi da se ukinu ovi kućni džemati što ih razni hoštafleri vode. Šta sad, treba pustit svakom da se igra džemata ko što se i oni mamlazi po Siriji i Iraku igraju hilafeta?

16. 02. 2016

Nekim ljudima i ženama je sevap šamarčinu svezat.

29. 02. 2016

Došo mladić u paradžemat i pita: Jel vam hodža musliman?

04. 03. 2016

Ima ljudi i žena Mushaf im na vrh vitrine i na kraj pameti.

05. 04. 2016

Veli mi jedan džematlija, jedan Esmir, veli Efendija ja postim samo zimi. Neka reko, dobro je i to, ljeti ćeš na onom svijetu.

12. 05. 2016

Nikog se ne tereti više neg što mu leđa mogu iznit, a opet svak svoj teret nosi. Bog Dragi zna mjeru i pošteno nam mjeri. Kad bi ljudi sami sebi mjerili, iskrvili bi se u nepravdi.

12. 05. 2016

Veli mi jedan džematlija, jedan Esmir, veli Efendija ja postim samo zimi. Neka reko, dobro je i to, ljeti ćeš na onom svijetu.

16. 05. 2016

Kad sam mlaji bio i još više neuk neg danas, u jednom sam selu kod Zavidovića, Bajvati se zovu, držo džemat. Ter jednoč na hutbi govorim ljudma kako će svak onaj ko je u Allaha vjerovo kadli tadli unić u Džennet. Istor se javlja jedan džematlija, jedan Uzeir, stajri čojek, i tobejarabi prikide mi hutbu viče: Efendija, hoćel i Sabit u Džennet, a to je njegov komšija s kojim je u zavadi cijelog života. Vičem ja - Hoće, Uzeiraga, al ne prikidaj mi više hutbe nikad. Viče Uzeiraga E ako će on, ja neću - i ode iz džamije.

16. 05. 2016

Nikog se ne tereti više neg što mu leđa mogu iznit, a opet svak svoj teret nosi. Bog Dragi zna mjeru i pošteno nam mjeri. Kad bi ljudi sami sebi mjerili, iskrvili bi se u nepravdi.

18. 05. 2016

Imamo u džematu jednog Fehima. Fehim je godinama pio i lumpovo al eto zadnjih godina se povuko i beš-vakat u džematu klanja, nekad na sabahu znamo bit samo on i ja. U zadnje je vrijeme počeo i mujezinit, a ima mi u džematu onih par kritičara pa viču Šta će on mujezinit, on je pio i lumpovo. Pa pitam ja Šta je braćo, jel treba da i dalje pije i lumpuje, jel to poruka i cilj?

18. 05. 2016

Kad sam mlaji bio i još više neuk neg danas, u jednom sam selu kod Zavidovića, Bajvati se zovu, držo džemat. Ter jednoč na hutbi govorim ljudma kako će svak onaj ko je u Allaha vjerovo kadli tadli unić u Džennet. Istor se javlja jedan džematlija, jedan Uzeir, stajri čojek, i tobejarabi prikide mi hutbu viče: Efendija, hoćel i Sabit u Džennet, a to je njegov komšija s kojim je u zavadi cijelog života. Vičem ja - Hoće, Uzeiraga, al ne prikidaj mi više hutbe nikad. Viče Uzeiraga E ako će on, ja neću - i ode iz džamije.

13. 07. 2016

Ne mora hodža sve znat, i vama je Allah pamet dao, valja nekad i promislit šta god.

17. 07. 2016

Kada im se kaže: "Ne remetite red na Zemlji!" - odgovaraju: "Mi samo red uspostavljamo!"

27. 07. 2016

Umio je rahmetli Sabrihafizović reć vako đahkad kad se snuždi gledajuć nekoje svoje kolege efendije: Ima l šta gore od hodžinskih trbuha.

25. 10. 2016

Ima naroda pocrka čekajuć da se hodžino samelje.

07. 11. 2016

Danas smo ukopali našeg džematliju Muharema, rahmet mu duši. Dobričina je bio, nije se istico po imetku i odjeći, djece nije imo, a volio je udijelit. Volio bi reć u mrazne zimske, kratke dane, kad akšam padne haman prije nego ikindiju sklanjamo: Gor se smrklo, dol se smrzlo, Allahu ti pomози. Nek ga ovaj džemat pamti po ovoj laganoj a vrijednoj kratkoj dovi.

12. 12. 2016

Ima ljudi i žena misle da je nafaka isto što i ljenost pa sjede povazdan pijuć kafu i đimove uvlačeć, čekajuć nafaku. Nafaka je ona najveća jabuka na vrhu stabla a ne ona natruhla što prva spadne.

18. 12. 2016

Opet ovih dana kokodaču šuplji alimi i ležeći mudžahidi. Oni što bi hilafet uspostavljali u tuđoj i dalekoj dočim u kući svojoj ne mogu vlast nad daljinskim uspostaviti pa se gledaju turske serije u vrijeme vijesti ili utakmice.

22. 12. 2016

Ne mjerite druge po sebi ni u dobru ni u zlu. Nit vam svako želi dobro ko što neki od vas svima žele nit svako kuje zavjere proću vas ko što neki od vas drugima kuju.

26. 12. 2016

Ima ljudi i žena cijeli im život par-nepar te jedan dan misle jedno a drugi dan misle drugo.

19. 02. 2017

Ima mladih hodža i hafiza često o umjerenosti vajze, a trbušine im već hoće kajševe pokidat.

21. 02. 2017

Ima ljudi i žena kupuju sećije od haram para pa se čude što ih leđa bole i ne mogu dobro spavat.

22. 02. 2017

Ima žena i ljudi udaju se jal ožene zbog para pa onda se ibrete što su nesretni tobož u ljubavi.

16. 03. 2017

Ima ljudi i žena tuđi hljeb jedu pa im ni doktori žgaravicu ne mogu zaustavit.

12. 04. 2017

Za neke ljude i žene ja drugog objašnjenja doli onog narodnog nemam: "Budali rekneš da prdne, on se posere."

24. 04. 2017

Viče mi neki dan jedan mlaji džematlija: Šejh-efendija, žena me ne sluša, ne znam šta ću. Hajde, bolan, reko, nije ni Adema alejhiselama njegova slušala pa su izrodili vas ibadulah.

26. 04. 2017

Ovdi blizu sela neki Arapi vikendice prave, viče mi jedan džematlija: Idi, Šejhavadago, pitaj ih trebal im hodža, bogati su Arapi, biće ti veća plata vego u našem džematu. Vičem ja njemu: Moj Huseine, ja da sam tio Arapima bit hodža ne bih se ni vraćo s hadža.

05. 05. 2017

Ima ljudi i žena jedno govore, drugo rade a ništa ne misle.

05. 05. 2017

Ovdi blizu sela neki Arapi vikendice prave, viče mi jedan džematlija: Idi, Šejhavadago, pitaj ih trebal im hodža, bogati su Arapi, biće ti veća plata vego u našem džematu. Vičem ja njemu: Moj Huseine, ja da sam tio Arapima bit hodža ne bih se ni vraćo s hadža.

15. 05. 2017

Ima ljudi i žena jedina im zadaća i poso na ovom svitu da budu opomena drugim ljudima i ženama.

15. 05. 2017

Ima ljudi i žena jedno govore, drugo rade a ništa ne misle.

15. 06. 2017

Ima ljudi i žena na Ovom svijetu žive tuđe živote a ne znaju da će na Onom bit pitani za svoje.

21. 06. 2017

Ima ljudi i žena što i u najboljem insanu probude zloću.

02. 07. 2017

Ima gazdi i gazdarica misle da oni daju a kad dođe dan da ih Bog nauči da oni samo Njegovo bogatstvo treba da pošteno raspoređuju među ljudima i ženama... e tad uglavnom bude plač i kuknjava.

31. 07. 2017

Ima ljudi i žena sve pare na moru potroše pa nemaju za kurbana.

31. 07. 2017

Ima političara danas jedu krmetinu a sutradan objašnjaju kako Islamska zajednica nešto treba ili ne treba.

01. 08. 2017

Ima ljudi i žena jednom upadnu u đeriz duše i uma pa ne izlaze nikad iz njeg.

05. 08. 2017

Ima ljudi i žena na Boga se ljute zbog ovih žega umjesto da mu zahvalni budu što im omogućuje trening za džehenem.

14. 08. 2017

U jednom su selu kraj Tešnja ljudi sebi iza rata sami napravili džamiju. U selu do njih par godina unazad napraviše evo neki Arapi džamiju od sebe. Viču sad neki u ovom selu di sami sebi napraviše džamiju: Pa mogli smo mi sebi put napraviti pa onda nek i nama Arapi džamiju prave. Veli mu jedan Remzo, ko biva glavni je on u selu, muhtar im neki, veli taj Remzo: Bolje do svoje džamije u blatnjavim opancima nego do tuđe u mercedesu. Ja nisam pametan, meni je svaka džamija dobra.

15. 08. 2017

Ima ljudi i žena sad ih ima sad ih nema.

17. 08. 2017

Nit je svako drvo voćka nit je svaki čovjek insan.

18. 08. 2017

Ima ljudi i žena misle da se prijevod Kur'ana za ukrasa štampe.

18. 08. 2017

A ima, opet, i ljudi i žena, svaki će poso i zanat naučiti samo da ne bi nekom drugom morali marku dati.

22. 08. 2017

Ima ljudi i žena guše se mesom iz svog a oči im na kupusu u tuđem tanjiru.

07. 06. 2018

More bit da šejtani uz ramazan jesu vezani u lance, al vallahi mnogo je ljudi i žena s pojakim klištima i drugim alatima pa očas pokidaju sve karike.

09. 06. 2018

Mučna su vremena, ljudi se gube ko abdesti po teferiču. Dunjalučke nas želje gone ko bijesni kerovi. Ima ono jedno aje, treba mu se vraćat: Zaista se srca smiruju kad se Bog spomene.

17. 06. 2018

Ima ljudi i žena siju kompire a čude se i galame kad im breske ne niknu.

20. 06. 2018

Neke se stvari haman moraju ponovit: Ima ljudi i žena jedno misle, drugo govore a ništa ne rade.

20. 06. 2018

Ima ljudi i žena ćeraju diecu da hafizi postaju a iz matematike im na popravni idu. Svakom njegov evlad, al meni je to sve nazor a nazor ništa ne valja.

26. 06. 2018

Ima ljudi i žena ne plaćaju račun za vodu a njome se avdeste. Pa se ibrete i kmeče što ko biva ništa u životu ne ide.

04. 08. 2018

Ima ljudi i žena bolje da ih nema.

07. 08. 2018

Kad su ono vladali komunisti, bio se navadio jedan inspektor Šabić dolazit mi prid džamiju i agitovat protivu klanjanja i Boga inače. Nisam se ja smio bunit, narodu sam govorio da šuti i ide za svojim poslom i gleda prida se, a mene jednom upita: Avdaga, ako je taj tvoj Bog svemoguć, može li stvoriti kamen koji sam ne može podić? Reko: Zavisi. Od čega, kaže. Reko: Od toga jel Bog to hoće ili neće.

18. 08. 2018

Ima vrata ne treba na njih ni pokucat a kamoli ih otvarat.

24. 08. 2018

Evo vam moje današnje hutbe skraćene: Nemojte bit hamelj u đerizu.

10. 09. 2018

Ima žena meleki im kroz oči gledaju. Al opet treba s bismilletom.

14. 09. 2018

"Ne volite nešto, a ono može biti dobro za vas; nešto volite, a ono ispadne zlo po vas. Allah zna, a vi ne znate."

20. 09. 2018

Ima žena meleki im kroz oči gledaju, i s bismilletom kreneš, al džabe - opet naograjšeš.

22. 09. 2018

Da umijem te zapise pisat vala bi sam sebi jedan napravio.

01. 10. 2018

Ima ljudi i žena i normalnih. Vjerovatno.

02. 10. 2018

Ima ljudi i žena pola života čekaju da im se nešto bitno desi pa ondar u jadima i tegobama shvate da su se desili sami sebi.

03. 10. 2018

Ima ljudi i žena nisu kapi popili u životu a mahmurni svaki dan hodaju.

04. 10. 2018

Došo mi prid džamiju jedan Almedin iz nekakvog kulturnog udruženja, veli: Efendija, mi bi prid džamiju postavili stećak. Šta bi, reko, postavili? Kaže: Stećak, znaš, to je naše naslijeđe, kultura i tradicija. Reko: Dijete drago, moreš tako i prid crkvu metnut nišan, pa vidi kako ćeš proć.

04. 10. 2018

Žali mi se džematlija Eset jedan mlaji momak, viče: Hodža nisam nikako u vinklu. Reko: Eso dragi, sagni se na ruku, pa ćeš bit u vinklu.

05. 10. 2018

Evo vam moje današnje hutbe skraćene: Nemojte bit kamen na koji narod posrće po cesti, budite kamen u temelju dobre kuće.

07. 10. 2018

Tri sorte ljudi Bog neće pogledat na Sudnjem danu. Stara bludnika, ohola siromaha i nepravедna vladara. Ne budite od njih i nek vas Bog Dragi od takvih sačuva.

07. 10. 2018

Pitaju me neki ljudi i žene jel glasanje ko biva farz il nije. Ne znam, dragi ljudi i žene, jel glasanje farz al poštena vlast jest.

09. 10. 2018

Na stari vakat, dok su se još hodže bavile narodom a ne narod njima, u Kovačima je kod Zavidovića držo džemat Ruvejd-efendija Pilavija, zvani Kalkala. Vele da je počesto govorio, po sijelima, kako je najlakše posrat se po tuđem poslu i zagledat u tuđu ženu.

10. 10. 2018

Ima ljudi i žena draži im varen kompir u tuđoj kući neg pečeno meso u njihovoj.

11. 10. 2018

Ima ljudi i žena nisu u životu Kul-Ja isprve bez greške proučili al su prvi kad treba mezhebe tumačit.

12. 10. 2018

Evo vam moje današnje hutbe skraćene: Svak svit mieri po sebi i kreće od sebe. Lopov viče da svi kradu, bludnik misli da svi bludniče, splotkaroš gleda kako da koga oberlati prije neg njemu neko šta podvali... A pošten insani, Allah ga učvrstio, ide tako dunjalukom i čudi se do po života što mu se ne uzvraća poštenjem. Al, braćo i sestre, ovaj je svit utakmica a pehari i medalje na Onom se raspoređuju.

13. 10. 2018

I ono najgore i ono najljepše nam je od Allaha. I zato uvijek uzdišemo - elhamdulillah.

16. 10. 2018

Ima ljudi i žena slomiše me pitanjima o tom kako se tobože more s džinima razgovorati a s pola komšija ne pričaju godinama. Nije svaki ćitab za svakog.

18. 10. 2018

Ima ljudi i žena povazdan pjevaju a posvunoć zlo misle.

19. 10. 2018

Evo vam moje današnje hutbe skraćene: Ne hodajte cestama i ulicama smrknuti i teški, zaista muslimani i muslimanke trebaju nurom imana iz sebe drugima pružati radost, vedrost, i lipu rič.

20. 10. 2018

Idite roditeljima dok su živi, idite kućama, jer kad krenete roditeljima ići na mezare pričati ćete i savjeta tražit al niko se odazvat neće.

21. 10. 2018

Bićete pitani i o tome kako ste primali i otpućivali i muhadžire i musafire.

21. 10. 2018

Nisu iskušenja jedino u oskudici i bolesti, poplavama i gladnim godinama. Ima ljudi i žena haman im jedina svrha da poštenu insanu budu iskušenje.

23. 10. 2018

Ima dana kad nebese insanu za vrat upadnu al i to su Božji dani ter treba i u njima reć elhamdulillah i krenut za poslom.

26. 10. 2018

Evo vam moje današnje hutbe skraćene: I od đubreta fajde ima kad se dobro razbaca. Na jednoj kamari i na jednom mjestu nikom niste od koristi. Hodajte, krećte se, putujte i širite lipu rič.

29. 10. 2018

U Preočici je džemat držo Husejn efendija Husejnović zvani Hafiz Hasan. Uz vake je vremenske prilike umio reć da je najbolja dova da čojek ne poludi uz jugovinu ona materina dova što čojeka prati otkad progleda.

01. 11. 2018

Pošto ću na put danas jerbo džumu držim sutra u jednom drugom džematu doli svom, evo vam odma moje hutbe skraćene: Dobar jedan ahabab more vam bit vridniji i od goleme rodbine. Nije ni Pejgamber na put u Medinu kreno s rodijacima vego s jaranom, Ebu Bekrom.

07. 11. 2018

Ima dana mučnih najbolje bi bilo teraviju iza sabaha sklanjat odma ne bil se insan malo razgalio.

09. 11. 2018

Evo vam moje današnje hutbe skraćene: Nailazite na odrasle ljude i žene koji se navaspitano ponašaju, ne umiju se upitat, laju, bacaju hamelj po cesti... Morete ih probat odgajat, mogućno će vam se trud i u sevap upisat, al ja kolko sam shvatio dosad: koga mater i otac ne odgoje ne mere mu pomoć ni škola, ni džemat, ni ummet cijeli da se sastavi.

12. 11. 2018

Najgora su mi sorta ljudi oni što pričaju proću sergija i davanja od sebe za druge i zajednicu. Dabogda im sve ono što ne dadnu a mogli su trebalo na Zadnjem Kantaru.

04. 12. 2018

Ima dana kad čojek ne zna ni šta pomislit a kamol šta reć. Najteže mi je u životu a i poslu bilo naučit ne reć ništa kad ne mislim ništa.

06. 12. 2018

Ne sjede ni šejtani ni meleći po ramenima vego u srce i u glavu uniđu. Pa kako ko kome.

07. 12. 2018

Evo vam moje današnje hutbe skraćene: Izbori su u Islamskoj nam zajednici, glasajte, izaberite poštene, vrijedne džematlije i džematlijske koje nije strah reć istinu i kojima neće bit mrsko potegnut i od sebe radit za džemat.

10. 12. 2018

Ima ljudi i žena prate mlogo kojom će nogom unić u kuću ili izać iz nje a nimalo ne prate hoćel đe u izmet cipelom ugazit.

01. 04. 2019

Ima ljudi i žena po tuđim kućama traže nafaku i berićet pa u svojoj najdu džehennem.

05. 04. 2019

Evo vam moje današnje hutbe skraćene: Nisam neuk al nisam ni plaho učen, al jope mislim pouzdano da ni na ovom ni na onom svitu neće hajra vidit oni od nas koji puste da im zemlja nezasijana propada. Ako sami vremena nemate, podajte drugima, rodbini, komšijama, potrebnicima. Ako ni takvih ne znate, podajte zajednici, uvakufite.

10. 04. 2019

Ima ljudi i žena na sve okasne, đahkad mi se čini da će stić navakat haman samo na Sudnji dan.

17. 04. 2019

Ima ljudi i žena ne treba vam šejtan kraj njih u životu.

19. 04. 2019

Evo vam moje današnje hutbe skraćene:

Ima gazdi i gazdarica misle da oni daju nafaku a kad dođe dan da ih Bog pouči da su oni samo trebali Njegovo bogatstvo pošteno da raspoređuju među ljudima i ženama... e tad bude plač i kuknjava. A kuknjava nije kajanje, ni pokajanje.

Jerbo, nikog se ne tereti više neg što mu leđa mogu iznit, a opet svak svoj teret nosi. Bog Dragi zna mjeru i pošteno nam mjeri. Kad bi ljudi sami sebi mjerili, iskrvili bi se u nepravdi.

29. 04. 2019

Ramazan nam ide, mante se budalaščina i zadrnosti. Ako ste s kimgod u zavadi kakvoj, prvi se javite i halalte jal halala tražite. Obajдите roditelje, sestre, braću, ahababe, fameliju. Ne lajte, ne ogovarajte, ne širite smutnju. Dobre vijesti ne krijte a loše ne uvećavajte. Ako hoćete. A ako nećete, ne morate, svak svoje brime nosi.

30. 04. 2019

Ima ljudi i žena koji misle da je sutra Kurban Bajram.

03. 05. 2019

Evo vam moje današnje hutbe skraćene: Od preksutra imate mjesec dana da primite najbolju godišnju vakcinu protiv one najgore sorte zla, one što dolazi iz čojeka samog.

03. 05. 2019

Ima ljudi i žena koji misle da je sutra Kurban Bajram.

04. 05. 2019

Evo vam moje današnje hutbe skraćene: Od preksutra imate mjesec dana da primite najbolju godišnju vakcinu protiv one najgore sorte zla, one što dolazi iz čojeka samog.

07. 05. 2019

Vako da vam rekнем, već iza prvog iftara i druge teravije, najglupja stvar kojom čojek more sebi post i ramazan skrhat u prazno jes priča o politici. A i pričanje o tuđim životima.

07. 05. 2019

Za svaku džamiju koju srušite napravićemo dvije nove.

13. 05. 2019

Ne vezuju se šejtani u lance vego ih mi sami moramo vezat. Svako svog a tuđeg ne zadirkivat.

13. 05. 2019

Vako da vam rekнем, već iza prvog iftara i druge teravije, najglupja stvar kojom čojek more sebi post i ramazan skrhat u prazno jes priča o politici. A i pričanje o tuđim životima.

27. 05. 2019

Blokovi za zekat i sadekatul-fitr u inboks.

7. 05. 2019

Ne vezuju se šejtani u lance vego ih mi sami moramo vezat. Svako svog a tuđeg ne zadirkivat.

29. 05. 2019

Sve što po džepovima, jastucima i bankama kamarite nije vaše. Božje je, dato vam u odgovornost i na volju. Vaše je samo ono što potrošite i udijelite.

29. 05. 2019

Blokovi za zekat i sadekatul-fitr u inboks.

05. 06. 2019

Kakva su vremena došla, Bože dragi, drogeraš govori da Reis ne valja a nesoј zadovoljan odobrava.

05. 06. 2019

Ko podržava nesoј, i sam se u nesoј vrsta. Mrš. Nije vam ovo nargilhana da otpuhujete dimove i pametujete a nije ni Bočinja ni Maoča pa da se vi kraj Zajednice igrate šerijata.

06. 06. 2019

Da ponovimo: Ima ljudi i žena nisu u životu Kul-Ja isprve bez greške proučili al su prvi kad treba mezhebe tumačiti.

06. 06. 2019

Ima, opet, ljudi i žena od arapskog umiju reć habibi al po internetu okupljaju halke tefsira.

09. 06. 2019

Mučna su vremena, ljudi se gube ko abdesti po teferiču. Dunjalučke nas želje gone ko bijesni kerovi. Ima ono jedno aje, treba mu se vraćat: Zaista se srca smiruju kad se Bog spomene.

17. 07. 2019

Ima momaka i cura odlažu ženidbu i udaju jerbo nešta plaho zagledaju, vagaju, mjere i traže. A kad u starost uniđu nit će imat čim nit koga zagledat i mjerit al će kukat na nikakvu sudbinu kobajagi il - neuzubilla - vikat da im Bog nije nafake dao. Bog jest Gospodar naših života al smo i mi neki upravnici koji se za nešta pitaju.

07. 10. 2019

Ima ljudi i žena misle da vi njihove mahane i zloće opravdavate samo zato što ih razumijevate.

02. 12. 2019

Ima ljudi i žena od narodnih para hljeb jidu a narodu o glavi rade. Nema tog gazde koji će njima, oholim i drčnim, na ovome svitu plaću smanjit. Al kad Bogu na saslušanje dođu biće kuknjava i dreka - džabe, za opomene i ukore će već kasno bit.

03. 12. 2019

Aje o kojem valja promislit đahkad:

"Svaki narod ima svoj kraj, i kad dođe njegov kraj, neće ga moći ni za tren jedan ni odložiti ni ubrzati."

19. 12. 2019

Ima momaka i cura viču mi da im posla nađem. A ja im kažem da se okrenu i idu drugim putem jerbo od tog tarikata nisam.

31. 12. 2019

Ne raspravljajmo se o mjerenju vremena, tuđoj ili našoj tobože novoj godini. Sve su godine Božje, dane nam u zajam, svako će svoj dug vraćat onako kako ga je potrošio.

01. 04. 2020

Sestre i braćo, jeste uvježbali itikaf?

28. 04. 2020

Ne kudite strogo i ne gonite gore od sebe gorima od njih. Mnogi je insan pod svakojakom vesvesom i sevap je golem osaburit i pripomoć, pružit ruku sestri jal bratu u jarku.

02. 09. 2020

Najteža dova na dunjaluku: Mili Bože, pomози mi da se ne radujem propasti onih koji su meni propast spremali.

23. 09. 2020

Prije hodže, treba otić doktoru. Hodža je za'nja stanica prije kabura.

24. 09. 2020

Ovo moram ponove:

Sve što po džepovima, jastucima i bankama kamarite nije vaše. Božje je, dato vam u odgovornost i na volju. Vaše je samo ono što potrošite i udijelite.

01. 12. 2020

Ima ljudi i žena suđeno im da se sretnu al im niko ne rekne kad i na kojem mjestu. Pa se sretnu kad ne treba jal di ne treba i onda dreka stoji. Pazite šta želite.

03. 12. 2020

U ona vremena kad su nam komunisti vladali, dojde meni u džemat jedna čivija im. Veli: Hodža, reci ponekad koju dobru i o nama. Rekoh: A što? Veli: Kupit ćemo ti vakufski stan.

09. 12. 2020

Ima ljudi, beli raspamaćenih otim raznim predavačima po internetima, dolaze meni i pitaju me: Šejh-efendija, smije li po islamu žensko voziti kola? Smije - velim - ako je položila vozački.

10. 12. 2020

U ona vremena kad se narod nije bavio hodžama nego hodže narodom, držao je Husejn efendija Husejnović, zvani Hafiz Hasan, džemat negdi kod Tešnja ili kod Viteza, ne pamtim dobro. Kako u ta vremena hodže plaća u parama nisu imale vego im je narod plaćao u mobi il u robi, dogovor je džematski bio da svaka kuća hodži odradi jednu nadnicu na njivi ljeti a dovuče jednu dobru bukovu vlak u zimi. Ispoštovale su džematlije sve, sve osim jednoga Ilijaza, koji je umjesto bukove dovukao jelovu vlak u. Svaka šuš a nekmoli jedan lisac kakvim biše Husejn efendija Husejnović, zvani Hafiz Hasan, znala je da od jelova drveta nema ništa doli cike i dima a nikakve toplote. Kad li dojde jednog dana džematlija Ilijaz Hafizu Hasanu i veli: Hodža, što ono u mene dijete zna samo jedno sure, ne mere se s jednim suretom ništa klanjat, pa ni sabah? Navodno mu je, priča se, Hafiz Hasan rekao: Pa šta ćeš, Ilijaze dragi, i ja na jelovom drvetu u šporetu mogu samo jedan guz ugrijati kad legnem spavati.

20. 12. 2020

Ima hafiza i ne znaju šta znaju napamet.

16. 02. 2021

Ima ljudi i žena u licu nikad ne ostare. Navodno je od abdesta, al prija će bit da je od mirna sna. A miran san je komadić dženneta na ovom svitu.

17. 02. 2021

Jedne mi prilike pristupi nikakav Harauz Zejid iz Donjih Krajeva i zatraži da "uložim amandman" na šesti imanski šart, tobejarabi. Šta se dalje zbilo, čekam da moj unuk Semiz Poluga opriča u svojoj knjizi koju piše već godinama, a kako je pospor i mrskorad, teško da će se to ikad desit.

19. 02. 2021

Ko ne stiže danas na džumu, evo moje hutbe skraćene:

Ko goj misli da je gazda na zemlji, jal preduzećem jal vlašću, shvatiće na Onom svitu ko je pravi gazda. Sve na zemlji je Božje i svi smo Božji uposlenici. Pa ko je sam sebe metno za poslovođu jal gazdu drugima, nek porazmisli jel ga ko imenovo na oto mjesto. Jerbo su računovođe u Jedinog Gazde ozbiljne i poštene i teško će se kroz knjige šta provući onako kako nije.

26. 02. 2021

Danas je taki petak da ću se nekako već popet na mimeru, proučit ono na arapskom pa reć: "Draga braćo, šta da vam kažem." Opet ono arapsko pa sić među džemat i sklanjat šta sleduje.

26. 03. 2021

Pod stare dane nisam puno snage trošio na činjenice. Tako sam jedne prilike tokom učenja salle reko da je umro Avdulah Tarabar umjesto Avdulah Poluga. Prvi se u tom trenutku zadesio u njivi. Dok je dotrčoo kući da ženi rekne da ipak nije umro, umrla je ona.

30. 03. 2021

Priča se još uvek da je rahmetli Sinan Tarabar zv. Sinan Krme (1935-2019) uz rat od hurmi rakiju pravio. Neki prenosiooci tvrde da je od te rakije bio oćoravio.

31. 03. 2021

Kad su neku nesretnu i obolilu curu iz nekog daljeg kraja doveli mom dići Šejhu Avdagi da joj šta god odući jal zapiše, on je samo reko: Bojim se da ovo nije slučaj za mene, posikla se na dlaku meleka.

01. 04. 2021

"Kerovi sami dođu, treba samo zviznut na pravi način." (Junuz Poluga, 1932-2014)

02. 04. 2021

Razgovor u Poluga:

- Babo, a što amidžu zovu Poslanik?

- Zato što je strina starija petnest godina od njega.

02. 04. 2021

"Ti bi jedino mogo bit hodža na nekoj omladinskoj radnoj akciji. Malo da vajziš, malo da ženskinju objašnjavaš kako se lopata drži", djed Šejh Avdaga kada me odvrćao od ideje da upišem medresu.

02. 04. 2021

"Ti bi jedino mogo bit hodža na nekoj omladinskoj radnoj akciji. Malo da vajziš, malo da ženskinju objašnjavaš kako se lopata drži", djed Šejh Avdaga kada me odvrćao od ideje da upišem medresu.

02. 04. 2021

"Ovo je dobar ker, poslušan. Triput mi je vratio zalutale džine kući. Jednom su bilesi priko Bosne bili otišli, al ih vrati i tad, ko ovce da vraća. Nema mira ako džini nisu pri kući", od oca mi amidžić Husnija Poluga zv. Alija, hvaleći svog posavskog goniča.

03. 04. 2021

Moj je dajdžić Iso Hanifić (1967) bio vanredno perspektivan student fizike. Ali eno ga od rata živi u planini sam. Navodno je jednom rekao: "Jebo civilizaciju koja još uvijek nije našla način da čovjek spakuje miris voljene žene i nosi ga uz sebe svijetom."

03. 04. 2021

"Bošnjaci se dijele na one koje na riječ 'voda' zamišljaju rijeku i one koji zamišljaju potok. Ako zamisle more, onda su se razbošnjačili", profesor aksiologije.

04. 04. 2021

- Šta ga grliš, neće na hadž! - rečenica je kojom otac prekori mater, kad me je zagrljajem pratila s kućnog praga u odrastanje.

Ima tomu godina mnogo.

Na Ćabi se, kako kažu, još glasio nisam, ali ima i dana kad sam si najveći hadžija

04. 04. 2021

Kad profesora aksiologije odvedoh u zavičaj, zamoli me da mu pokažem Ušljivi potok. O tom mu lokalitetu godinama pričah tokom kafanskih druženja.

- U pravu si, ako ide, ovdje treba postaviti Sirat-ćupriju! – reče nakon što se nadvi nad provaliju koja dijeli zemlju Poluga od kuća Hanifića.

04. 04. 2021

Pristupio djedu Šejh Avdagi jedne prilike izvjesni Fatimić, iz Donjih Krajeva, te upitao: "Mogu li oženiti curu iz četvrtog koljena famelija".

"More. Više će te se volit kad ste rod", razriješio je djed dilemu.

05. 04. 2021

"Ovaj uređaj, koji sam ja sam konstruisao i napravio, u stanju je uhvatit frekvenciju meleka u pokretu", Sinan Tarabar zv. Sinan Profesor, držeći u ruci motornu pilu Husqvarna, gdje umjesto mača vire stotine prozirnih žica, koje titraju skladno; 1997., pijaca u Zavidovićima.

05. 04. 2021

"Šta te ne ubije - jebe te do kraja života" - moja tetka Hanka Poluga udata Šeftelić, poznata i po nadimku Hankara.

06. 04. 2021

- Će si, zemljače - reče gđin M., moj tadašnji šef, nekom dugonji na ulici u Minneapolis, Minnesota, jednog vrućeg ljetnjeg dana.

- Ama, kako si znao da sam iz Bosne - otpovrnu čovjek radosno.
- Po potkošulji ispod majice.

07. 04. 2021

Otišao dajdža Veiz Hanifić na konak svojoj ćeri a mojoj dajdžišni Zejni u Frankfurtu. Uđe u neku sobu da klanja akšam, kad tamo unuka mu Amina vježba jogu.

- Pokrij se kad klanjaš - navodno je dajdža rekao.

07. 04. 2021

Malo je poznato da sam umalo postao muzičar ali je sve stalo kad je nene Mevlia Hanifić r. Gnjecu bacila moju gitaru kroz prozor, uz objašnjenje: - U ovom se govnetu džini kote.

Kad sam od djeda Avdage, glasovitog hodže kojemu su uz ime prišli i šejha - jedno dakle stručno lice - zatražio podršku, rekao je: - P'... lašnje mi je s džinima štogod raspraviti vego šnjom. Nemoj me, živ bio u otaj poso. Daću ti pare za novu tamburu al sakrij od nje.

Ipak, incident će me utoliko uznemiriti da se nikada neću usuditi kupiti novi instrument. Svakako, strah od džina također je igrao ulogu. Novac dobiven od djeda iskoristio sam za kupnju jedne izvrsne kožne jakne.

08. 04. 2021

Uoči petka je, pored ostalih blagodati, važno i što je prekosutra subota.

09. 04. 2021

"Ne bi bio tvoje vozilo ni mog brata Azema konj da mi date po dunjaluka", rahmetli mi otac Rahman Poluga zv. Alija, dok sam ga vozio na mevlud na Lastavicu.

Suštinu ove priče je, u izmijenjenoj predaji, potvrdio i Sinan Tarabar zv. Sin, koji je jedne prilike kazao: „Fala ti, Bože, što me stvorio ko čojka a ne ko konja, jerbo me moglo zapast da budem Azema Poluge konj.“

11. 04. 2021

"Koji muftija? Allah je jedini muftija!" - Ćašif Poluga zvani Ashab, jedne godine prilikom klanja kurvana tokom rasprave o određenom šerijatskom pitanju.

12. 04. 2021

Prilika je da ponovimo ovu poruku djeda Avdage Hanifića:

Ramazan nam ide, mante se budalaščina i zadrnosti. Ako ste s kimgod u zavadi kakvoj, prvi se javite i halalte jal halala tražite. Obajдите roditelje, sestre, braću, ahababe, fameliju. Ne lajte, ne ogovarajte, ne širite smutnju. Dobre vijesti ne krijte a loše ne uvećavajte. Ako hoćete. A ako nećete, ne morate, svak svoje brime nosi.

04. 06. 2021

"Ovi narod u životu i milosti Božjoj održava relativno velik broj hajr-česmi kraj puteva." - Ćašif Poluga zv. Ashab

07. 06. 2021

"Kako to slijedite sunnet a sjedite u džamiji kad se sunneti klanjaju?" - rođo Mehemed Poluga tokom rasprave s mojim bratom Ćasifom zv. Ashab.

08. 06. 2021

"Ja nikad nisam dijelio ljude na Srbe i Hrvate. Meni je to sve isto." - moj mlađi brat Ćašif Poluga zv. Ashab, tokom neke radionice o pomirenju.

09. 06. 2021

Moj mlađi brat Ćašif Poluga, tada još uvijek bez nadimka Ashab, vratio se jednog dana s linije duge brade. Nikad se više nije obrijao. O pojedinostima njegovog bradatog i plemenitog života pisat ću kad stignem. I ako me ponese.

09. 06. 2021

"S obzirom da si, po vlastitom pričanju, prve novce u životu zaradio kopajući mezar nekom daljem rođaku, dobro ovo poduzeće ikako opstaje s tobom na platnoj listi", gospodin M. meni, nakon što sam nepromišljenošću upropastio jednu dobru poslovnu priliku.

12. 06. 2021

Oženi se momak, dođe mlada. Kum rasklopi kundak na M70AB2 i istrese rafal pod oblak. Prolomi se pjesma. Djecu zaspu bombonama, mesinganim čahurama i kovanim markama.

Uda se djevojka. Ostavi ime na kućnom pragu. Doziva ga pred spavanje i priča sa sobom.

14. 06. 2021

I hodža čeka da se nečije samelje.

15. 06. 2021

S raznim sam sortama ljudi iz mnogih profesija drugovao i službovao ali držim da su ponajgori književnici i vodoinstalateri.

20. 06. 2021

Abdest i gusul morskom vodom. Provjereno protiv upale sinusa.

25. 06. 2021

Ovo moramo ponove:

Ima ljudi, beli raspamaćenih otim raznim predavačima po internetima, dolaze meni i pitaju me: Šejh-efendija, smije li po islamu žensko voziti kola? Smije - velim - ako je položila vozački.

26. 06. 2021

Malo je poznato da sam u ulozi prijatelja veliki motivator. Neki dan sam, primjerice, dvojici jarana uputio poticajnu poruku: Ako se za dvije godine ne oženite, nećemo se više družiti.

28. 06. 2021

Pitalo me jednom: Smije li žena izaći iz kuće?

Rekoh: Smije ako joj čojk smije sam ostati kod kuće.

29. 07. 2022

Unuka Ulfeta Hanifića smo otputili u medresu, jer je njegov otac Zulkarnejn odlučno upozorio: "Nek ide u to, kupat će mrtve, mrtav mušterija se ne mere požaliti."

05. 08. 2022

Evo jedne stare hutbe, kratke, ponove:

Kakva su vremena došla, Bože dragi, drogeraš govori da Reis ne valja a nesoje zadovoljan odobrava.

20. 08. 2022

Ono je Debelo brdo. Od njega nas dijeli široka dolina Željeznice. To brdo je daleko, ne možemo tamo ubiti čovjeka kalašnjikovom sve i da bogovski ciljamo. Prije rata to brdo je bilo jedna mjera. Svako bi na Znetvi kad prestane pušiti usnio kako je zapalio toliku cigaru da je puši pred kućom a žigu joj naslonio na Debelo brdo. Taj san je kružio i obuzimao tek regrutovane nepušače. Sanjali smo izobilje, poput svake sirotnje.

20. 08. 2022

Ako u džennetu nećemo lebdjeti svom silom, čemu nada onda. Lahkoća u snazi, moć bez napora, nije li nam Gospodar upravo to oduzeo poslavši nas Zemlji, da neredujemo po njoj.

23. 08. 2022

Ima ljudi lijepih i glatkih k'o lakirana jelovina. Ali kroz lak drvo ništa ne upija.

11. 04. 2023

Kad ono uniđe u modu da se teravija napušća na osam rekjata, mnogi je imam na razne načine pokušavao uvjeriti džemat da se tako ne čini. Uglavnom, nije bilo fajde. Navodno je samo metoda Husein-ef. Husagića zvanog Hafiz Hasan imala učinka. Otklanjao bi u komadu osamnaest rekjata, pa ko hoće nek napušća.

15. 04. 2023

Kad jedne godine braća Sinan Tarabar zv. Sin i Sulejman Tarabar zv. Kalamar nabaviše patke, amidža Azem Poluga je u prolazu kraj bašče im hraknuo: "Šta je sljedeće, krmad?"

25. 04. 2023

Pitaju te o svemu i svačemu. Reci: Ne znam.

24. 04. 2024

Ima ljudi uvakufe pare od droge.

25. 04. 2024

Ima ljudi i žena postoje samo da bi bili živi dokaz da je sve iz sureta Felek i Nas istina.

06. 05. 2024

Na Zapadu more sebi žena prišit onu mušku stvar a narod joj mora govoriti "Kako je, ljudino". Al ne mere ta neka žena, eto, na fakultetu reći da je ubijanje djece zločin.

Ovo sam čito kod jednog francuskog komunjare.

06. 05. 2024

Ima ljudi i žena postoje samo da bi bili živi dokaz da je sve iz sureta Felek i Nas istina.

10. 05. 2024

Ima ljudi i žena uđu u sektu. Ima ih i izađu iz te sekte. Al odmah uđu u drugu. Pa treću. Pa na kraju u džehennemsku sektu.

10. 05. 2024

Nije casual Friday, nego lipi petak.

15. 05. 2024

Ima ljudi ufati ih policija u sitnom zijanu i strpa u bajbuk. Priznaju i šta nisu uradili, ženi na oči ne smiju.

21. 05. 2024

Vidio sam čojka da liči na oca, a i čojka da liči na dida, amidžu, brata, dajdžu. Navodno poneko liči i na komšiju. Viđa se danas - liče ljudi i na svoje kerove. Al samo je rahmetli Senahid-efendija Arslanović ličio na svoju ženu.

27. 08. 2024

Ima ljudi pišu "Ima ljudi" namjesto "Ima ljudi i žena".

09. 02. 2025

Kakav je vakat, najbolje bi nam bilo da nafile počnemo obavljati kao da su farz.

14. 02. 2025

Toliko sam dobru sedžadu nabavio da i ikindijske sunnete klanjam.

19. 02. 2025

Munafici su počesto iznimno duhoviti, privlačni i šarmantni ljudi. Čuvajte se zabavnih mutikaša.

19. 02. 2025

Ima ljudi i žena postoje samo da bi bili živi dokaz da je sve iz sureta Felek i Nas istina.

01. 04. 2025

Ne plaća članarinu, redao bi safove.

01. 04. 2025

Medijsku hampu i smutnju oko prvih safova glavne bošnjačke džamije neću tumačiti. Ali hoću reći nekoliko riječi o safanju i drugim vidovima džamijskog, a time i općeg društvenog reda.

U starim, ozbiljnim džematima, u kojima i hodže i džematlije vrše svoje zadatke, vlada jedan suptilni, duboki, stoljećima usavršavani, Kur'anom nadahnut red. Naravno, taj red se danas gubi i u najčvršćim džematima, jer muslimani u Bosni polahko potpadaju pod zapadnu, liberalnu koncepciju sebstva: ja kao ja, jedino ja, ja sam najvažniji, sve moje druge uloge u društvu su sporedne.

Ali dok se taj red još uvijek nije izgubio i dok smo živi mi koji ga pamtimo, kojima nedostaje i koji ponekad pokušamo da ga vratimo, opišimo jedan njegov sloj.

Znalo se, a pogdjegdje se još uvijek zna, ko tačno može, treba i smije proći u prvi saf. Starije, učeivnije, redovnije, uglednije i naprosto – u svakom pogledu – dostojnije džematlije. Sjećam se džemata i džamija u kojima je cijeli prvi saf bio pod francuzicama ili hadžijskim kapama. Nezamislivo je bilo da u taj saf prođe dijete, sve i da je ne znam čiji sin ili unuk. Nezamislivo je bilo da uleti neko ko nije redovan džematlija. Iza hodže je obavezno stajao isključivo onaj koji ga može, i po znanju i po ugledu, zamijeniti ako mu se šta desi pa istupi. Sjećam se odlučnosti s kojom su skromni i pošteni ljudi odbijali stati iza hodže, svjesni da nisu spremni ponijeti takvu odgovornost.

Znalo se, a pogdjegdje se još uvijek zna, ko može i u drugi saf, mada je drugih safova sve manje.

Znalo se, a pogdjegdje se još uvijek zna, da na džumama ili bajramima – po jednom dubokom, diplomatskom, suptilnom redu i poretku – na mahfil/musander idu džematlije koji su svjesni da svojim ponašanjem nisu možda dostojni da budu u „glavnom“ dijelu džamije. Primjer je to fascinantnog društvenog reda, kakav odumire, kakav moderna država i moderna civilizacija smišljeno uništava. U takvom redu čovjek svjestan svojih mahana i propusta ne samo da priznaje jedan nevidljivi, nepisani red, nego dobrovoljno i bez ikakve uvrijeđenosti izvršava svoj dio obaveza koje proizlaze iz tog reda.

Danas u prvi saf ide ko god hoće, jer danas – u duhu religije liberalnog humanizma – svaka budala misli da on vrijedi najviše i svaki je pojedinac sam sebi mali bogić. Tako odu u prvi saf, pričaju za vrijeme hutbe, okrenu tabane prema kibli, samo što ne legnu. O onima koji namjerno odu u prvi saf da bi izašli prije kraja namaza i gacali ispred klanjača kvareći im namaz – drugi put.

Rahmet duši svim našim dobrim, plemenitim, razložnim francuzicama i šamijama i drugim džematlijama koji su čuvali red. A nama živima neka Bog dadne više pameti.

02. 04. 2025

Ako Čojek A stalno i uporno priča ružno o Čojeku B, velika je vjerovatnoća da mu je Čojek B puno valjao u životu, a Čojek A ne razumije da neko nekom more valjat onako, Dobra radi, pa misli da je nešto konkretno dužan Čojeku B i da će ovaj kadli-tadli doći po svoje, pa onda sve zato unaprijed minira teren i rastresa govna oko sebe da mu Čojek B ne bi prišao i da ko sa strane ne bi napravio neku dunjalučku jednačinu po kojoj on, Čojek A, treba nešto da vrati Čojeku B.

(Ovo ispade zapetljano ko Kul-ja, al šta ću sad.)

03. 04. 2025

U pogledu borbe i ratovanja postoje dvije vrste Bošnjaka:

1. oni koje nakon rata treba konzervirati i otvoriti samo u slučaju novog rata,
2. oni koje treba konzervirati čim zapuca i otvoriti ih kada se rat okonča.

Naizmjeničnom upotrebom ove dvije vrste Bošnjaka postiže se učinkovita ravnoteža djelovanja i pobjeđivanja u ratnim i mirnodopskim okolnostima.

04. 04. 2025

Prvo tedžvid pa onda tefsir.

11. 04. 2025

Ima ljudi dođu u džamiju, uzmu telefon i čitaju vijesti.

To je to, to je moja današnja hutba, skraćena.

20. 04. 2025

Glasali za magarca a sad pomagajšu što ih slamom hrane.

05. 05. 2025

Na tuđoj babovini možeš napraviti građevinu ali nikada kuću. Isto što u tuđem duhovnom i intelektualnom naslijeđu možeš steći znanje i vještine, ali nikada pamet i kreativnost. Samo zaronjen u vlastito naslijeđe možeš biti istinski kreativan, živo autentičan, svoj ali razumljiv.

08. 05. 2025

Da ne umr jedan papa pa drugog moradoše birat, ja ne bih znao da ovoliko Bošnjaka katolika ima.

09. 05. 2025

Dova uz današnju hutbu (koju nećemo ni skraćenu navesti): Allahu dragi, daj mi da doživim prizore iz drugog ajeta sure „Iza džae“.